

難陀品第十(欣樂十二偈)

王舍國城東	曾為富尊者
時世穀飢貴	有道士遊彼
時我坐獨食	有好道士來
壞破緣一覺	自在得無漏
興起貪嫉意	其心志于惡
今此比丘來	焉得同太歲
於是念飲食	雜糅以馬通
道人食之已	應時即命過
我身壽終已	墮地獄甚久
合會及叫喚	世世見脯煮
從地獄得出	便還得人身
身常多疾病	懊惱而命盡
如是五百世	在所生處
抱病常窮厄	懊惱乃命過

於是最後世	已得生人中
還見等正覺	導師無有上
出家為沙門	受釋師子法
已得羅漢道	清涼取滅度
吾於是仁者	神足無有漏
身體多疾病	所在不安隱
於是悉識念	我本所作行
皆獲其果實	罪福不可離
如是難陀尊	在比丘眾中
於阿耨達池	自說本所作